



# Formazion dai zovins no dome pe culture ma ancje pe economie

Il gnûf Retôr de Universitât dal Friûl Alberto Felice De Toni al presente i siei progjets. «Colaborazion cu la Filologjiche»

## di Giuseppe Mariuz

Dal prin di Otubar l'Universitât dal Friûl e à un Retôr gnûf, Alberto Felice De Toni, 58 agns, nassût a Padue, professôr ordinari di Organizazion de produzion e Gjestion dai sistemis compless tal cors di lauree in Ingegnerie gjestionâl. Al cjape il puest di Cristiana Compagno e al tignarà il puest pai prossims sîs agns academics. *Mariuz* i à domandât al Retôr De Toni cualis che a son lis ideis e i progjets de Universitât tal cantin de culture e de lenghe furlane.

**- Professôr De Toni, nus disial in struc ce che e rapresente la nestre Universitât pal Friûl?**

«Dut, o disarès. Tant par tacâ, e je il mieç di istruzion e di educazion pe nestre zoventût, stant che i iscris dal Ateneu a son pe plui part furlans. I docents e i ricercjadôrs a furnissin la didatiche e a disvilupin i lôr progjets sul teritori, sul am-



Il gnûf retôr Alberto Felice De Toni

bient, su la storie, su la scuele, su la popolazion, sul tiessût produtîf e imprenditoriâl, vâl a dî su ogni aspjet de societât regionâl».

**- Cemût lu fasie?**

«La cualitât e je dal sigûr une vore buine e no je la mê opinion, stant che lu confermin l'analisi e la comparazion di ducj i indicadôrs di valutazion ministeriâl. Si podarès rivâ a ni-

vei inmò plui alts, se nol fos par cause di un storic sot-finanziament, che al reste un grant limit par ogni nestre azion».

**- A cui si puedial domandâ di plui?**

«A dutis lis istituzions, publichis e privadis, che a puedin metinus in stât di rinfuarcî il nestri compit. La cualitât, come che o ai za dît, e je sigurade».

**- Feveln de cuistion furlane: lenghe, culture, tradizions, identitât.**

«A 'ndi son ativâts insegnaments a Lenghis, a Letaris e a Siencis de formazion e cun di plui o promovin in particolâr la lenghe furlane a traviars dal Centri interdipartimentâl di ricercje su la lenghe e la culture dal Friûl (Cirf). O podin fâ di altris programs impuartants, cheste la liste in struc: formazion dai insegnants ancje cuntun *curriculum* specific pal furlan e in furlan; formazion di zovins ricercjadôrs cu la scuele di dottorât; formazion dai operadôrs dai sportei lenghistics e des





Palaz Antonini, sede storiche da Universitât dal Friûl

amministrazion publichis; poie ae ricercje universitarie pai progjets su la lenghe furlane; continuitât par cierts insegnaments di impuartance pal teritori (lenghistiche furlane, antropologjie culturâl e altris materiis colegadis). O zonti ancje che o podaressin meti adun gnovis sinergjiis cuntune risorse impuartante: i emigrants. A traviers des relazions cu lis comu-

nitâts furlanis tal forest si pues meti in vore une rêt di convenzions e di tirocinis».

### - Cuâl isal il rapuart cu la Filologjiche?

«O soi za stât in visite te sede de Societât, ospit dal president Federico Vicario, e o ai preseât la fuarte strutture e la serietât dal lavôr di ceste istituzion; la Filologjiche, par altri, e custodi di simpri i valôrs de tradi-

## Su la nestre taule che nol mancji un plat di pes

**LA PERAULE.** La cusine furlane e je une cusine di cjars e di mignestris, di dolçs e di verduris. No si pues dî che il pes al sedi un ingredient trop doprât tes nestris mangiativis tradizionâls. Sta di fat che, in di di vuê, cuant che o lin dal pessâr, dispès o doprin i nons dai pes par tallian. La nestre marilenghe, però, e à peraulis par dutis lis besteutis che si viodin sul bancon de pescjarie. Par esempli, pai pes di aghe dolce come il rainat (par tallian “carpa”), il luç (“luccio”), la trute (“trouta”), il salmon (“salmone”) o la tencje (“tinca”). Compagn pai pes di aghe salade, come il bracin (“branzino”), la orade (“orata”), la trie (“triglia”) o lis vrils (“frittura”). Se o vin vole di capis, o podin siezli tra pedôis (“cozze”), caparoçui (“vongole”), capis lungjis (“capelunghe”) o capis santis (“capesante”). (p.r.)

zion furlane, de sô lenghe e culture e no stin a dismenteâsi che – ai timps – e à vût promovût la racuelte di firmis dal Comitât pe Universitât furlane di Tarcisio Petracco. Il gno auguri al è pardabon di podê quartâ indevant insieme cierts progjets di interès comun e di largje prospetive, pal ben de nestre comunitât regjonâl».

© RIPRODUZIONE RISERVATA